

05/02/2001

Korporat disaran sokong usaha cungkil bakat muda

Wan Jailani Abd Razak

SEKTOR swasta, terutama badan korporat disaran menjadikan kejayaan negara menganjurkan Le Tour de Langkawi (LTdL) 2001 yang masuk edisi keenam sebagai iktibar untuk turut serta membangunkan sukan itu di peringkat akar umbi.

Menteri Belia dan Sukan, Datuk Hishammuddin Hussein, berkata pembabitan mereka perlu bagi menarik minat generasi muda menceburi sukan itu yang berupaya memupuk nilai murni seperti jati diri, keyakinan dan komitmen untuk mencapai kejayaan.

Menurutnya, dengan adanya kerjasama semua pihak, kejohanan itu dapat dijadikan pemangkin untuk memupuk dan mempertahankan nilai murni itu pada masa depan.

"Nilai murni bukan sahaja perlu kepada seseorang pelumba untuk muncul juara, malah ia juga dapat dipupuk di sanubari generasi muda bagi menghadapi cabaran alaf baru," katanya yang mewakili Perdana Menteri, Datuk Seri Dr Mahathir Mohamad ketika melancarkan kejohanan itu di Dataran Lang, Langkawi, semalam.

Hadir sama, Pengerusi Eksekutif First Cartel Sdn Bhd, Datuk Wan Lokman Wan Ibrahim dan Pengerusi Jawatankuasa Belia dan Sukan Kedah, Datuk Md Hassan Bulat.

Hishammuddin berkata, dengan penyertaan badan korporat juga, bakat baru dapat diketengahkan di kalangan pelajar menerusi penyediaan jurulatih dan aspek lain.

Kejohanan berprestij dengan jarak 1,838 kilometer itu menawarkan hadiah RM1 juta dan ia adalah perlumbaan terunggul di Asia selain Tour de France dan Giro d'Italia.

Wan Lokman pula berkata, kejohanan itu sudah dikenali di seluruh dunia sehingga ada pasukan luar negara berminat menyertainya walaupun atas tanggungan sendiri.

Menurutnya, ini terbukti apabila Team Fakta dari Denmark melengkapkan penyertaan 25 pasukan pada LTdL 2001 atas perbelanjaan sendiri setelah pasukan Linca McCartney dari Great Britain menarik diri pada saat akhir.

Malah, kejohanan itu turut menarik minat penerbit filem Bollywood untuk menjalankan penggambaran filem percintaan 'Yaadein' yang dibintangi Hrithik Roshan dan Kareena Kapoor dengan berlatarkan perlumbaan itu.

(END)